

Акафист Пресвятой Богородице пред иконой «Косинская» «Моденская»)

Кондак 1

Избранней от всех родов Пресвятей Госпоже Деве Богородице
благодарственная пения приносим Ти, раби Твои, яко прославила еси
божественный образ Твой чудодействием. Ты же, всемилостивая Владычице,
яко имущая державу непобедимую, от всяких нас бед свободи, да зовем Ти:

Радуйся, Владычице, иконою Твою благодать и милость нам являющая.

Икос 1

Ангел множество и вся небесная воинства славят Тебе, Царицу всех
Богородицу. Ты же исполнила еси радости души наша милостивым
пришествием к нам образа Твоего святаго, в немже залог несомненный
Божия благоволения и Твоего небеснаго заступления нам ниспослалася. Темже,
радующиеся, славословим Твоё милосердие и песненно Тебе вопием:

Радуйся, благословенная Дево, от всех родов Богом избранная и паче всех
возвеличенная; радуйся, Небесная Царице, Господа Бога Мати и Творца
всяческих.

Радуйся, яко Тебе вся небесная воинства величают; радуйся, яко Тебе вся
колена земная Матерь Божию исповедуют.

Радуйся, яко предстояще славней иконе Твоей, Самой Тебе истинней Матери
Божией покланяемся; радуйся, яко силу Твою благодатную сей иконе
обильно даровала еси.

Радуйся, отrado наша и дивное о нас попечение; радуйся, от нужд, печалей и
бед непреложное избавление.

Радуйся, любве божественныя явление; радуйся, чудес преславных
совершение.

Радуйся, духа уныния и боязни отгнание; радуйся, духа радости и крепости
стяжание.

Радуйся, Владычице, иконою Твою благодать и милость нам являющая.

Кондак 2

Видящи премилосердная Мати Божия скорбное житие наше, немощи и болезни, благоизволи дати нам в радость и спасение и от всяких бед и напастей ограждение икону Свою святую. Не умолчим никогда, Заступнице наша преславная, о всех Твоих благодеяниях, да не будет под спудом свет чудес Твоих. Сего ради величаем Тя, возвеличившую род наш Твоим благоволением, прославляем благочестным пред святым образом поклонением и благодарственне вопием о Тебе Богу: Аллилуя.

Икос 2

Разум недоразумевает достойно песнями духовными восхваляти Тя, Небесная Царице. Ты бо восхотела еси знамение Твоево благодати явити людем во иконе Твоей; в нощном бо видении многим болящим явльшися, Пресвятая Дево, повелела еси молебная пения совершати пред святою иконою Моденскою и омытися в находящемся близ церкви езере. Болящии же деяху с верою повеленная и чудесно исцеляхуся. Мы же, с любовию прославляюще Тя, помощнику нашу всеизрядную, немолчными гласы вопием:

Радуйся, Своим пришествием нас обогащающая; радуйся, всех прибегающих под кров Твой приемлющая.

Радуйся, раны греховныя благоутробно врачующая; радуйся, праведный гнев Божий на нас Твоим молением скоро утоляющая.

Радуйся, терпеливых страдальцев дары благодатными ущедряющая; радуйся, к покаянию нас призывающая.

Радуйся, грешных молений не отвергающая; радуйся, желания богоугодная исполняющая.

Радуйся, радость скорую подающая; радуйся, на смиренныя призывающая.

Радуйся, врагов наших видимых и невидимых побеждающая; радуйся, любящая и чтущая Тя от всяких бед избавляющая.

Радуйся, Владычице, иконою Твою благодать и милость нам являющая.

Кондак 3

Силою свыше обогатившееся цельбоносною иконою Богоматере, приидите и видите божественное сокровище, всем прибегающим дары чудес обильно подающее. Что убо воздадим Господеви, сицевое человеколюбие нам

явившему, чудотворный образ сей, яко небесный дар, нам ниспославшему и верных просветившему, вопиющих Ему хвалебную песнь: Аллилуия.

Икос 3

Имущи богатство милосердия неоскудное, от пречистыя Твоей иконы токи чудес источила еси, Владычице, болящим исцеление, страждущим ослабу и всем вся полезная подавающи. Мы же, памятующе выну покров Твой, молим Тя: Всемилостивая Госпоже Дево Богородице, одержими есмы печальми, не остави убо до конца погибнуть рабом Твоим, но ускори изъяти от настоящия скорби и печали вопиющих к Тебе:

Радуйся, принесением честныя Твоей иконы тьму лютых обстояний от нас отгоняющая; радуйся, пораженных различными недуги чудесно исцеляющая.

Радуйся, от врат смертных неисцельно болящих к жизни возвращающая; радуйся, горестию телесных страданий вечных мук избавляющая.

Радуйся, скорбьми грехи наша очищающая; радуйся, печалию немоющи душевныя врачующая.

Радуйся, ожесточенно враждующих примиряющая; радуйся, прилоги врага отражающая.

Радуйся, во всяких скорбех и печалех небесную отраду в сердца наша изливающая; радуйся, от разорения, плена и лютыя смерти всех уповающих на Тя свобождающая.

Радуйся, злосмрадие страстей и похотей наших всемощным мановением укрощающая; радуйся, самых отчаянных грешников из рова погибели исхищающая.

Радуйся, Владычице, иконою Твою благодать и милость нам являющая.

Кондак 4

Бурю смятений и раздоров, врагами воздвигнутую в стране нашей, умири, Владычице, да не погибнем в беззакониих наших. Огради нас иконою Твою от враг видимых и невидимых, и тако, укрепляеми Тобою, до конца живота своего вопием Создателю нашему: Аллилуия.

Икос 4

Слышавше ближний и дальний о дивнем чудеси святыя иконы Твоей, Пречистая Владычице, со усердием многим притекаху к цельбоносному Твоему образу, приемлюще от него дары неисчислимых Твоих благодеяний.

Темже и мы, аще и недостойни суще, со благоговением и радостию поклоняемся сему чудному образу Твоему и достодолжно Тя песньми ублажаем:

Радуйся, свитче божественный, в немже перстом Божиим написася Слово; радуйся, от начала веков во главизну нашего спасения предъизбранная.

Радуйся, скиние, Духом Святым осененная; радуйся, Благодатная, всеми добродетельми преукрашенная.

Радуйся, вся ангельская чины превосходящая; радуйся, блаженное чрево, невместимаго всеми Бога вместившее.

Радуйся, яко млеком Твоим питала еси Питателя вселенныя; радуйся, Мати преблагословенная.

Радуйся, от небесных славимая и от земных хвалимая; радуйся, мира горняго первейшее украшение.

Радуйся, маслино, елеем милосердия нас умащающая; радуйся, чудо чудес Одигитрие, на путь спасения нас наставляющая.

Радуйся, Владычице, иконою Твою благодать и милость нам являющая.

Кондак 5

Яко лучезарную звезду, чудотворную икону Матере Твоей показал еси нам, Господи; ибо, взирающе на образ Ея телесныма очима, умом и сердцем к Первообразней возвышаемся. О пречудная Мати Света! Огнем небесным коснися смущенные души мои и исполни ю веры непостыдныя, надежды известныя и любве нелицемерныя, да всегда пою и славлю Тя, святейшую Матерь всесильного Бога, вопия Ему: Аллилуиа.

Икос 5

Видевше преславную икону Твою, Пречистая, со умилением уразумеша вси неотступный покров Твой и милостивое о нас промышление. Тебе, благую Заступницу нашу, прилежно молим: заступи, покрый и соблюди нас от бед, озлоблений и падений греховных, осени благодатию Твою, да, отвергше горечь греха, сладость благочестия обрящем и, на истинную стезю добродетели и спасения наставляемии, зовем Ти:

Радуйся, яко чудес и целеб подательнице; радуйся, у Господа спасения нашего ходатаице.

Радуйся, иноков благоподвзывающихя всемощная покровительнице; радуйся, всех христиан вожделенная помощница.

Радуйся, неразумных премудрая вразумительнице; радуйся, целомудрия и воздержания незримая охранительнице.

Радуйся, скорая в бедах и печалех утешительнице; радуйся, заблудших наставнице.

Радуйся, всех немощных целительнице; радуйся, грешных споручнице.

Радуйся, погибших взыскание; радуйся, нечаянная грешных радосте.

Радуйся, Владычице, иконою Твою благодать и милость нам являющая.

Кондак 6

Проповедуют милости Твоя, Богомати, вси концы вселенныя, ибо честным покровом Твоим покрывающи и защищающи весь род христианский, и, ведуще Тя воистину помощницу сильну и непобедиму, со слезами приносят Ти молитвы, да простреши к Сыну Твоему богоносней руце за люди Твоя, во еже избавити нас от всех бед и напастей, да благодарне вопием Богу, Тобою нас спасающему: Аллилуя.

Икос 6

Возсия неизреченная благодать от цельбиносныя Твоей иконы, Пресвятая Дево, пред неюже, со слезами припадающе, молим: всесильная рода нашего Заступнице и Помощнице, отжени облак нашедших на ны искушений и всяких злокозненных действий врагов наших видимых и невидимых и мирное устроение обуреваемым напастьюми даруй, на Тя бо все упование возлагаем и умиленно Тебе зовем:

Радуйся, образ Твой чудотворный в утешение и исцеление дати нам изволившая; радуйся, всемощным Твоим заступлением от бед нас избавляющая.

Радуйся, искушаемым руку помощи простирающая; радуйся, во дни уныния надеждою вечных благ воодушевляющая.

Радуйся, от треволнения моря житейского кающихся спасающая; радуйся, всем потребным ко благочестию снабдевающая.

Радуйся, зависть и коварство на нас злых человек премудро разрушающая; радуйся, лживых провидцев и суэтная гадания посрамляющая.

Радуйся, чистотою Твою чистому житию нас научающая; радуйся, окаменение сердечное умягчающая.

Радуйся, хладность душевную благодатно согревающая; радуйся, верных пастырей Святыя Церкве укрепляющая и вразумляющая.

Радуйся, Владычице, иконою Твою благодать и милость нам являющая.

Кондак 7

Хотя явити велию любовь Свою к людем Человеколюбец Господь, Тебе, Мать Свою пренепорочную, покров и защиту роду христианскому дарова, да будеши печальным утешение, скорбящим радование, отчаянным надежда, вечныя муки Своим ходатайством избавляющая и к небесному веселию всех приводящая вопиющих непрестанно гласом хваления Сыну Твоему и Богу нашему: Аллилуиа.

Икос 7

Проповедник неизреченных чудес Твоих, Владычице, явися храм сей, святою иконою Твою украшенный. Попущением бо Божиим, грех ради человеческих, все благолепие его некогда погибе, икона же чудотворная руками безбожных изъята бысть, но милостию Божию уцеле и паки возвращена бысть в храм, идже ныне честно пребывает. Мы же, неизреченному смотрению Твоему дивящиеся, радостно взываем Ти:

Радуйся, в годину напастей и испытаний чудотворную икону Свою во утешение нам сохранившая; радуйся, скорбная сердца наша вторым обретением образа Твоего возвеселившая.

Радуйся, новую милость и новую благодать сим в Церкви являющую и тем путь спасения показующая; радуйся, осенением святыя Твоя иконы злых духов мечтания от нас удаляющая.

Радуйся, непочитающих иконы Твои святыя, яко прах, от лица земли развеивающая; радуйся, юродивую мудрость века сего посрамившая и ослепленных ею на путь правый наставляющая.

Радуйся, светом Христова учения тьму неверия прогоняющая; радуйся, временным наказанием невежд умудряющая.

Радуйся, прославляющих Тя прославляющая; радуйся, Твоим ходатайством грехи наша прощающая.

Радуйся, Твоим молением печали наша утоляющая; радуйся, Тя на помошь призывающих и имя Твоё славящих спасающая.

Радуйся, Владычице, иконою Твою благодать и милость нам являющая.

Кондак 8

Дивное чудо зrim, егда чудотворная икона Твоя, Владычице, с песнями духовными приносится в храм Господень. Торжествуйте вси, зряще несомую икону Царицы Небесныя, от неяже токи чудес с верою приходящим источаются, недуги врачаются и скорби утоляются. Сего ради, прославляюще Бога, давшаго нам благодать таковую, вопием Ему: Аллилуia.

Икос 8

Всем вся благая и спасительная даруешь от святых чудотворных иконы Твоей, Богомати Пречистая, юже, яко сокровище многоценное, зряще, со гласом радования и благодарения взываем: Кто не ублажит Тя, о Мати наша милосердная! Кто не воспоет Твоя славная чудеса! И мы, грешни, любовию к Тебе побеждаем, отверзаем недостойная уста своя на похвалу Тебе сицевую:

Радуйся, всежелательное всего мира зрение; радуйся, неподвижимое веры благочестия основание.

Радуйся, всесветлое благодати познание; радуйся, жезле Ааронов, прозябший нетление.

Радуйся, светильниче, на свещнице превышнем поставленный; радуйся, лествице небесная, Иаковом предвидимая.

Радуйся, благородная отрасле богоизбранного рода Давидова; радуйся, палато Духа Пресвятаго.

Радуйся, огненный престоле невидимаго Царя; радуйся, честнейшая и славнейшая без сравнения всех небесных сил.

Радуйся, прекраснейшая всех дщерей человеческих; радуйся, воистину присноблаженная и пренепорочная.

Радуйся, Владычице, иконою Твою благодать и милость нам являющая.

Кондак 9

Всякое естество удивися неизреченному действу силы Твоей, Дево Пренепорочная, егда, многомощно свирепствовавшей холере в Косине и окрестных селениих его, приносима бываше сия чудотворная икона. Заступлением Твоим, всемилостивая Владычице, недузи отступаху, людие же, исцеление получивше, вопиют Богу: Аллилуia.

Икос 9

Витии многовещаний недоумеют воспети по достоянию силу благодати, Тобою иконе сей дарованную. Кая ли песнь сладкопевца достойна будет восхвалити вся чудеса Твоя, яко принесением иконы Твоей во всяко место благодеяния различна источаются, долгонедужныя и разслабленныя исцеляются? Человецы же, Тобою тако помилованнии, из глубины душизывают Ти:

Радуйся, предстательнице к Богу, мир от бед спасающая; радуйся, милости сокровище многоценное нам открывающая.

Радуйся, безчисленныя щедроты всем подавающая; радуйся, почитати Тя нас научивающая.

Радуйся, ко спасению и восприятию благ вечных наставляющая; радуйся, нераскаянных грешников к покаянию обращающая.

Радуйся, хулителей святыя православныя веры невидимо карающая; радуйся, иконою Твою, яко столпом огненным, мрак греха отгоняющая.

Радуйся, от междуусобных брань охраняющая; радуйся, вражия козни расторгающая.

Радуйся, Русь православную возлюбившая; радуйся, веру истинную в ней утвердившая.

Радуйся, Владычице, иконою Твою благодать и милость нам являющая.

Кондак 10

Спасения ищащие, к Тебе прибегаем, милосердная Мати, и, чудотворную Твою икону ныне обстоящие, со благоговением и верою чествуем, ибо всем покланяющимся Тебе скорое вспоможение подаваешь и во иных градех и весех чтуших Тя полезное прощение исполняешь. Темже, воспоминающе неисчислennая чудотворения Твоя, вопием всемогущему Богу: Аллилуia.

Икос 10

Стена еси Ты, ограждающая нас от всяких болезней, всем с верою призывающим Тя в помощь, Пресвятая Дево Богородице. Ты бо, Владычице, младенцу, зело страждущему, исцеление даровала еси. Сего ради, прославляющее Твое Матернее милосердие, благодарственными устами вопием Ти вси из глубины души:

Радуйся, яко принесением иконы Твоей болезни лютая прекращающая; радуйся, всем во всякой потребе вся полезная и благая подавающая.

Радуйся, добрыя обеты приемлющая; радуйся, призывающих Тя заступающая.

Радуйся, сумнящихся утверждающая; радуйся, супругом любовь и согласие подавающая.

Радуйся, матерей детородящих скоро и безболезненно разрешающая; радуйся, чад их благодатно охраняющая.

Радуйся, скорбным вдовицам и сирым помогающая; радуйся, пагубных удары грома и молнии от нас отводящая.

Радуйся, яко огнь, поясающий дома и пажити людских, росою молитв Твоих угашающи; радуйся, благая домостроительница, житие наше доброе устроющая.

Радуйся, Владычице, иконою Твоей благодать и милость нам являющая.

Кондак 11

Пение наше, аще бы было и тъмочисленное, не довлело бы к достойному прославлению милостей Твоих, всехвальная Владычице, яже непрестанно изливающи роду человеческому. Мольбу безчадных супругов, пришедших к чудотворней иконе Твоей, не оставила тщетну, но даровала еси им милость деторождения. Обаче, да не неблагодарни явимся пред Тобою, по силе нашей похвальная восписуем Ти с любвию вопиюще Богу: Аллилуия.

Икос 11

Яко светоприемную свещу, зрим Твою честную икону, Пречистая и Преблагословенная Дево Богородице. Невещественный же в душах наших возжигающи огнь любви к Тебе, Всеблагая, приими веру и усердие наше, направи на стези истины путь наш, умоли Господа и Сына Твоего, да спасет нас, имиже весть судьбами, да не погибнем в нераскаянии о грешех наших, и услыши моление к Тебе взывающих:

Радуйся, иконою Твоей нам благодеющая; радуйся, Матерния щедроты Твоя на нас изливающая.

Радуйся, греховные помыслы властно отгоняющая; радуйся, маловерных вразумляющая.

Радуйся, неверных смыслы просвещающая; радуйся, милосердие Божие разумети нам помогающая.

Радуйся, страх Божий в сердца верных влагающая; радуйся, о храмех Божиих попечение имущих духовною радостию утешающая.

Радуйся, от сна лености нас возставляющая; радуйся, омраченных светом богопознания и благочестия озаряющая.

Радуйся, блага земная, суетная и скоропреходящая, презирати нас научаяющая; радуйся, к небесным и вечным сокровищем умы и сердца наша возводящая.

Радуйся, Владычице, иконою Твою благодать и милость нам являющая.

Кондак 12

Благодать Божия, присущая святей иконе Твоей, пречудная Царице Богородице, влечет к ней всех скорбящих и обремененных, и, радость сии получивше от сего источника Твоих милостей и щедрот, благодарно вопиют благих подателю Богу: Аллилуя.

Икос 12

Поюще Твоя чудеса, бывшая в древняя и настоящая времена, хвалим Тя, Богородице, яко неисчерпаемый источник милости, яко неистощимую реку чудес и, прибегающе к Твоему всесильному заступлению, взываем, помощи Твоя просяще: буди нам, всеблагая Владычице, покров и защищение и в день кончины нашея, и егда имамы предстати на суд страшному престолу Сына Твоего, да не постыдимся во уповании нашем, еже по Бозе крепко на Тя возлагаем, вопиюще:

Радуйся, любовь к Тебе имущим врата райская отверзающая; радуйся, на милость к нам грешным Господа преклоняющая.

Радуйся, на путь исправления заблуждающихся направляющая; радуйся, согрешающих покаяние милостиво приемлющая.

Радуйся, во дни скорби люди Твоя укрепляющая; радуйся, в час смертный тьму вражию от нас отгоняющая.

Радуйся, безболезненную и мирную кончину устрояющая; радуйся, вечного царствия у Сына Твоего и Бога нашего всем нам просящая.

Радуйся, Тобою бо нисходит к нам Божие благоволение; радуйся, грехов наших непоминование.

Радуйся, от власти князя воздушного свободжение; радуйся, геенны вечныя избавление.

Радуйся, Владычице, иконою Твою благодать и милость нам являющая.

Кондак 13

О всепетая и всемилостивая Мати, приими ныне молебное пение наше, пред чудотворною иконою Твою с верою и благоговением Тебе возносимое. Призри милостивно на веру и упование наше и всесильными Твоими молитвами избави нас от всякия напасти, болезни, внезапных смерти и сподоби в блаженстве вечном со всеми святыми хвалу Богу воспевати: Аллилуя.

Этот кондак читается трижды, затем 1-й икос «Ангел множества...» и 1-й кондак «Избранней от всех родов...».

Молитва

О премилостивая и пречудная Света умнаго Мати, достойно славимая и праведно от всех горных чинов ублажаемая, яко без сравнения их превосходящая, Бога и Творца всяческих рождшая! Благодарим Тя о всех благодеяниях Твоих, яже благоволила еси явити нам преславным принесением чудотворных Твоих икон. Кое благохваление пришествию Твоему сотворим, недоумеваем, точию удивляемся, величающе Твое милосердие, еже на нас показала еси. Темже и мы, грешнии, со страхом и радостию припадающе к цельбоносной иконе Твой, благодарственно вопием Ти: о всесильная рода нашего Помощнице! Услыши нас, молящихся Тебе, и яви милость Твою; се бо, на пречистый образ Твой взирающе, яко живей Ти с нами сущей, молим Тя усердно: не помяни множества грехов наших, но исполни во благих прошениях, даруй нам вся потребная к животу и благочестию, избави нас от скорбей, бед и всяких болезней, наипаче же от смертоносных язв и пагубы, от навета злых человек и всякаго обстояния. Соблюдай и спасай нас благодатию Свою, Владычице, от тлетворных учений неверия и суеверия, от лукавых совращений. Со храни нас и отчество наше от всяких крамол, нестроений и злых развращений, врагами веры православных воздвизаемых. Сподоби же нас, всеблагая Заступница наша, благочестно житие сие земное совершити, христианскую безболезненную, непостыдную, мирную кончину получить и Небесное Царствие наследовать, да всегда поем, величаем и славим Тя, яко благую Заступницу рода христианского, со всеми угодившими Богу. Аминь.

Тропарь, глас 4

К Богородице прилежно ныне притицем, грешний и смиренний, и припадем, в покаянии зовуще из глубины души: Владычице, помози, на ны

милосердовавши, потщися, погибаем от множества прегрешений, не отврати Твоего рабы щы, Тя бо и едину надежду имамы.

Кондак, глс 6

Не имамы иныя помощи, не имамы иныя надежды, разве Тебе, Пречистая Дево, ты нам помози, на Тебе надеемся и Тобою хвалимся, Твои бо есмы раби, да не постыдимся.

Величание

Величаем Тя, Пресвятая Дево, богоизбранная Отроковице, и чтим образ Твой святый, имже точиши исцеления всем с верою притекающим.